

iam dudum Syrio madefactus tempora nardo  
debueram sertis implicuisse comas.

\*

Liber quartus, 1

Te, Messalla, canam, quamquam me cognita virtus  
terret: ut infirmae nequeant subsistere vires,  
incipiam tamen. at meritas si carmina laudes  
deficiant, humilis tantis sim conditor actis,  
nec tua praeter te chartis intexere quisquam  
facta queat, dictis ut non maiora supersint.  
est nobis voluisse satis, nec munera parva  
respueris. etiam Phoebos gratissima dona  
Cres tulit, et cunctis Baccho iucundior hospes  
Icarus, ut puro testantur sidera caelo  
Erigoneque Canisque, neget ne longior aetas.  
quin etiam Alcides, deus adscensus Olympum,  
laeta Molorcheis posuit vestigia tectis,  
parvaeque caelestis placavit mica, nec illis  
semper inaurato taurus cadit hostia cornu.  
hic quoque sit gratus parvos labor, ut tibi possim  
inde alios aliosque memor componere versus.

alter dicat opus magni mirabile mundi,  
qualis in immenso desederit aere tellus,  
qualis et in curvum pontus confluxerit orbem,  
et vagus, e terris qua surgere nititur, aer,  
huic et contextus passim fluat igneus aether,  
pendentique super claudantur ut omnia caelo:  
at, quodcumque meae poterunt audere Camenae,  
seu tibi par poterunt seu, quod spes abnuit, ultra  
sive minus – certeque canent minus –, omne vovemus